


周氏醫學啟書



巢氏諸病源候總論卷七

傷寒病諸候

凡三十三論

傷寒候

經言春氣溫而夏氣暑熱秋氣清涼冬氣冰寒此則四時正氣之序也冬時嚴寒萬類深藏君子固密則不傷於寒夫觸冒之者乃爲傷耳其傷於四時之氣皆能爲病而以傷寒爲毒者以其最爲殺厲之氣也卽病者爲傷寒不卽病者其寒毒藏於肌骨中至春變爲溫病夏變爲暑病暑病者熱重於溫也是以辛苦之人春夏必有溫病者皆由其冬時觸冒之所致非時行之氣也其時行者是春時應暖而反寒夏時應熱而反冷秋時應

涼而反熱冬時應寒而反溫非其時而有其氣是以一歲之中病無少長多相似者此則時行之氣也夫傷寒病者起自風寒入於腠理與精氣交爭榮衛否隔周行不通病一日至二日氣在孔竅皮膚之間故病者頭痛惡寒腰背強重此邪氣在表洗浴發汗卽愈病三日以上氣浮在上部胸心填塞故頭痛胸中滿悶當吐之則愈病五日以上氣深結在藏故腹脹身重骨節煩疼當下之則愈夫熱病者皆傷寒之類也或愈或死皆以六七日間其愈皆以十日以上何也巨陽者諸陽之屬也其脈連於風府故爲諸陽主氣故人之傷於寒也則爲病熱雖甚不死其兩感於寒而病者必死兩感於寒者

其脈應與其病形何如兩傷於寒者病一日則巨陽與少陰俱病則頭痛口乾煩滿二日則陽明與太陰俱病則腹滿身熱不食譫言三日則少陽與厥陰俱病則耳聾囊縮厥逆水漿不入則不知人六日而死夫五藏已傷六府不通榮衛不行如是之後三日乃死何也陽明者十二經脈之長也其氣血盛故不知人三日其氣乃盡故死其不兩傷於寒者一日巨陽受之故頭項痛腰脊強二日陽明受之陽明主肉其脈夾鼻絡於目故身熱而鼻乾不得臥也三日少陽受之少陽主骨其脈循脇絡於耳故胸脇痛耳聾三陽經絡皆受病而未入通於藏也故可汗而已四日太陰受之太陰脈布於胃絡

於噎故腹滿而噎乾五日少陰受之少陰脈貫腎絡肺
繫舌本故口熱舌乾而渴六日厥陰受之厥陰脈循陰
器而絡於肝故煩滿而囊縮三陰三陽五藏六府皆病
榮衛不行五藏不通則死矣其不兩感於寒者七日巨
陽病衰頭痛少愈八日陽明病衰身熱少愈九日少陽
病衰耳聾微聞十日太陰病衰腹滿如故則思飲食十
一日少陰病衰渴止不滿舌乾已而欬十二日厥陰病
衰囊縱少腹微下大氣皆去病日已矣治之奈何治之
各通其藏脈病日衰其病未滿三日者可汗而已其病
三日過者可泄之而已太陽病頭痛至七日已上並自
當愈其經竟故也若欲作再經者當針補陽明使經不

傳則愈矣相病之法視色聽聲觀病之所候脈要訣豈不微乎脈洪大者有熱此傷寒病也夫傷寒脈洪浮秋佳春成病寸口脈緊者傷寒頭痛脈來洪大傷寒病少陰病惡寒拳而利手足四逆者不治其人吐利躁逆者死利止而眩時時自冒者死四逆惡寒而拳其脈不至其人不煩而躁者死病六日其息高者死傷寒熱盛脈浮大者生沈小者死頭痛脈短濇者死浮滑者生未得汗脈盛大者生細小者死診人瀼瀼大熱其脈細小者死不治傷寒熱病脈盛躁不得汗者此陽之極十死不治未得汗脈躁疾得汗生不得汗難瘥頭痛脈反濇此爲逆不治脈浮而大易治細微爲難治發汗若吐下者

若亡血無津液者而陰陽自和必愈夫下後發汗其人
小便不利此亡津液勿治其小便必自愈陽已虛尺中
弱者不可發其汗也咽乾者不可發其汗也傷寒病脈
弦細頭痛而發熱此爲屬少陽少陽不可發汗發汗則
誠語爲屬胃胃和則愈不和則煩而悸少陰病脈細沈
而微病在裏不可發其汗少陰病脈微亦不可發汗無
陽故也陽已虛尺中弱澀者復不可下太陽病發熱而
惡寒熱多而寒少脈微弱則無陽不可發其汗脈浮可
發其汗發熱自汗出而不惡寒關上脈細數不可吐若
諸四逆病脈者不可吐虛家亦然寒多熱少可吐者此
謂痰多也治瘧亦如之頭項不强痛其脈微胸中痞牢

衝喉咽不得息可吐之治傷寒欲下之切其脈牢實
之脈或不能悉解宜摸視手掌澱澱汗濕者便可下矣
若掌不汗病雖宜下且當消息溫暖身體都皆津液通
掌亦自汗下之卽了矣太陰之爲病腹滿吐食不可下
下之益甚時腹自痛下之胸下結牢脈浮可發其汗陽
明病心下牢滿不可下下之遂利殺人不可不審不可
脫爾禍福正在於此太陽與少陽合病心下牢頭項強
眩不可下三陽并病腹滿身重大小便調其脈浮牢而
數渴欲飲水此不可下其湯熨針石別有正方補養宣
導今附於後

養生方導引法云端坐生腰徐以鼻內氣以右手持鼻

閉目吐氣治傷寒頭痛洗洗皆當以汗出爲度
又云舉左手頓左足仰掌鼻內氣四十息止除身熱背
痛

傷寒發汗不解候

傷寒初一日至二日病在皮膚名爲在表表者陽也法
宜發汗今發汗而不解者此是陽不受病陽受病者其
人身體疼痛發熱而惡寒勅嗇拘急脈洪大有此證候
則爲病在表發汗則愈若但煩熱不惡寒身不疼痛此
爲表不受病故雖強發其汗而不能解也

傷寒取吐候

傷寒大法四日病在胸膈當吐之愈有得病二三日便

心胸煩悶此爲毒氣已入有痰實者便宜取吐

中風傷寒候

中風傷寒之狀陽浮熱自發陰弱汗自出嗇嗇惡寒漸
漸惡風噦噦發熱鼻鳴乾嘔此其候也太陽病中風以
火劫發其汗邪風被火熱血氣流溢失常兩陽相熏灼
其身發黃陽盛卽欲衄虛則小便難陰陽俱虛竭身體
則枯燥但頭汗出齊頸而還腹滿微喘口乾咽爛或不
大便久則誠言甚者至噦手足躁擾尋衣摸牀小便利
者其人可治陽明中風口苦而咽乾腹滿微熱惡寒脈
浮若緊下之則腹滿小便難陽病能食爲中風不能食
此爲中寒少陽中風兩耳無聞目赤胸中滿而煩不可

吐之吐之則悸而驚太陰中風四支煩疼其脈陽微陰
澀而長爲欲愈少陰中風其脈陽微陰浮爲欲愈厥陰
中風其脈微浮爲欲愈不浮爲未愈

傷寒一日候

傷寒一日太陽受病太陽者膀胱之經也爲三陽之首
故先受病其脈絡於腰脊主於頭項故得病一日而頭
項背膊腰脊痛也

傷寒二日候

傷寒二日陽明受病陽明胃之經也主於肌肉其脈絡
鼻入目故得病二日肉熱鼻乾不得眠也諸陽在表表
始受病在皮膚之間可摩膏火灸發汗而愈

傷寒三日候

傷寒三日少陽受病少陽者膽之經也其脈循於脇上於頸耳故得病三日胸脇熱而耳聾也三陽經絡始相傳病未入於藏故皆可汗而解

傷寒四日候

傷寒四日太陰受病太陰者脾之經也爲三陰之首是故三日已前陽受病訖傳之於陰而太陰受病焉其脈絡於脾主於喉嗑故得病四日腹滿而嗑乾也其病在胸鬲故可吐而愈

傷寒五日候

傷寒五日少陰受病少陰者腎之經也其脈貫腎絡肺

繫於舌故得病五日口熱舌乾渴而引飲也其病在腹故可下而愈

傷寒六日候

傷寒六日厥陰受病厥陰者肝之經也其脈循陰器絡於肝故得病六日煩滿而囊縮也此則陰陽俱受病毒氣在胃故可下而愈

傷寒七日候

傷寒七日病法當小愈陰陽諸經傳病竟故也今七日已後病反甚者欲爲再經病也再經病者是陰陽諸經絡重受病故也

傷寒八日候

傷寒八日病不解者或是諸陰陽經絡重受於病或因發汗吐下之後毒氣未盡所以病證猶在也

傷寒九日已上候

傷寒九日已上病不除者或初一經受病卽不能相傳或已傳三陽訖而不能傳於陰致停滯累日病證不罷者或三陽三陰傳病已竟又重感於寒名爲兩感傷寒則府藏俱病故日數多而病候改變

傷寒咽喉痛候

傷寒病過經而不愈脈反沈遲手足厥逆者此爲下部脈不至陰陽隔絕邪客於足少陰之絡毒氣上熏故咽喉不利或痛而生瘡

傷寒斑瘡候

傷寒病證在表或未發汗或經發汗未解或吐下後而熱不除此毒氣盛故也毒既未散而表已虛熱毒乘虛出於皮膚所以發斑瘡隱軫如錦文重者喉口身體皆成瘡也

傷寒口瘡候

夫傷寒冬時發其汗必吐利口中爛生瘡以其表裏俱虛熱熱不已毒氣熏上焦故也

傷寒登豆瘡候

傷寒熱毒氣盛多發胞瘡其瘡色白或赤發於皮膚頭作癰漿戴白膿者其毒則輕有紫黑色作根隱隱在肌

肉裏其毒則重甚者五內七竅皆有瘡其瘡形如登豆故以名焉

傷寒登豆瘡後滅瘢候

傷寒病發瘡者皆是熱毒所爲其病折則瘡愈而毒氣尙未全散故瘡痂雖落其瘢猶麤或凹凸肉起所以宜用消毒滅瘢之藥以傳之

傷寒謬語候

傷寒四五日脈沈而喘滿者沈爲在裏而發汗其津液越出大便爲難表虛裏實久久則誠語發汗後重發其汗亡陽誠語其脈反和者不死陽明病下血而誠語者此爲熱入血室但頭汗出當刺期門穴隨其實者而瀉

之澌然汗出者則愈病若讞言妄語身當有熱脈當得洪大而反手足四厥脈反沈細而微者死病也讞言妄語身熱脈洪大者生沈細微手足四逆者死

傷寒煩候

此由陰氣少陽氣勝故熱而煩滿也少陰病惡寒而拳時自煩欲去其衣被者可治也病脈已解而反發煩者病新瘥又強與穀脾胃氣尙弱不能消穀故令微煩損穀卽愈少陰病脈微細而沈但欲臥汗出不煩欲自吐五六日自利後煩躁不得臥寐者死發汗後下之脈平而小煩此新虛不勝穀氣故也

傷寒虛煩候